

Malawi Primary Education

# Chichewa

Buku la ophunzira  
la Sitandade

3



Malawi Institute of Education

Produced and printed with support from



***Adakonza ndi kusindikiza bukuli ndi a***

Malawi Institute of Education  
PO Box 50  
Domasi  
Zomba  
Malawi

Email: miedirector@sdnp.org.mw

Website: www.mie.edu.mw

© Malawi Institute of Education, 2017

Zonse za m'bukumu n'zosati munthu akopere mu njira ina iliyonse popanda chilolezo. N'zosatinso munthu kapena bungwe lichitire malonda m'pang'ono pomwe. Komabe ngati munthu kapena bungwe likufuna kugwira ntchito ya zamaphunziro ndi bukuli, pafunika kupempha ndi kulandira chilolezo kuchokera kwa omwe adalisindikiza.

Kusindikiza koyamba 2017

ISBN 978-99960-44-08-3

## Olemba

Jeremiah Kamkuza	Directorate of Inspectorate and Advisor y Services (DIAS)
Foster JN Gama	Malawi Institute of Education
Frackson Manyamba	Malawi Institute of Education
Lizinet Daka	Department of Basic Education
Victor Mdangwe	Department of Teacher Education
Jane Somanje-Phiri	Northern Education Division
Elias Chilenje	Phalombe Teachers' College
Esther Chenjezi-Chirwa	Lilongwe Teachers' College
Ndamyo Mwanyongo	Kasungu Teachers' College
Jordan Namondwe	Chiradzulu Teachers' College
Irene Kameme	Blantyre Teachers' College
Chrissie Misuli-Chiweza	Machinga Teachers' College
Henry Mkanda	Domasi College of Education
Patrick Mkumba	Malawi National Examinations Board
Fexter Mtonza	N'gabu Secondary School
Samson Distone	Likangala Secondary School
Alice Menyauti-Waliwa	Mzuzu Government Secondary School
Jacob Chanza	Montfort Demonstration Primary School
Catherine Nundwe-Mainjeni	Lilongwe Demonstration Primary School
Delia Gwetserapo	Domasi Government Primary School
Vincent Somanje	Mary View School for the Deaf

Nellie Mkwaso-Matoga	Police College Primary School
Martha Chumachiyenda	Gumbu Primary School
Esther Mwawa	Naliswe Model Primary School
Sautseni Lombola	Chirimba Primary School
Joyce Kauni	Malikha Primary School
Ida Simbota	Nyungwe Primary School
Milliam M Mtumbuka	Lubagha Primary School
Margaret Sapili	Mmanga Primary School
Mcwell Nyasulu	Malokotera Primary School
Limbani Tseka	Chiole Primary School

## Kuthokoza

A Unduna wa za Maphunziro, Sayansi ndi Luso pamodzi ndi a Malawi Institute of Education akuthokoza onse omwe adathandizapo mu njira zosiyanasiyana kuyambira polemba bukuli kufika polisindikiza.

Iwowa akuthokozango kwambiri bungwe la United States Agency for International Development (USAID) International Development (DFID) ndi Department for pothandiza ndi ndalamu komanso upangiri kuti buku la ophunzirali alilembe, aliunike ndi kulisindikiza mogwirizana ndi *Mlingo wa Boma Wounikira Maphunziro M'sukulu* (National Education Standards) komanso *Ndondomeko ya Boma Yokhudza Kuwerenga M'sukulu* (National Reading Strategy).

Iwo aonanso kuti n'koyenera kuthokoza anthu onse omwe adaunikanso bukuli ndi kupereka upangiri osiyanasiyana.

## Okonza

Akonzi	:	Max J Iphani, Peter Ngunga, Chris Laymaman ndi Sylvester Ngoma
Woyala mawu ndi zithunzi	:	Emmanuel B Chikaonda ndi Sanderson Ndovi
Wojambula zithunzi	:	Isaiah Mphande ndi Heath Kathewera
Otayipa	:	Kate Katete
Mkonzi Wamkulu	:	Max J Iphani

## Zamkatimu

Kuthokoza .....	v
MUTU 1 Kondwani ajomba kusukulu .....	1
MUTU 2 Kusamalira thupi .....	5
MUTU 3 Gwape achititsa msonkhano .....	9
MUTU 4 Malamulo apasukulu .....	16
MUTU 5 Kubwereza zam'mbuyo ndi kuyesa ophunzira	19
MUTU 6 Kugwira ntchito zofanana .....	21
MUTU 7 Zochitika m'mudzi mwa a Chewe.....	25
MUTU 8 Kupewa ngozi zapakhomo .....	28
MUTU 9 Nkhalango yathu .....	31
MUTU 10 Kubwereza zam'mbuyo ndi kuyesa ophunzira	35
MUTU 11 Atsogoleri am'kalasi .....	37
MUTU 12 Kusamala zovala .....	41
MUTU 13 Mudzi wachitsanzo .....	45
MUTU 14 Malingaliro am'tsogolo .....	49
MUTU 15 Kubwereza zam'mbuyo ndi kuyesa ophunzira	53
MUTU 16 Masewera a ana .....	56
MUTU 17 Kusamala zakudya .....	60
MUTU 18 Nkhalango yosungira nyama .....	64
MUTU 19 Dziko lachita mantha .....	69

MUTU 20	Kubwereza zam'mbuyo ndi kuyesa ophunzira	72
MUTU 21	Gogo Luwamba alangiza adzukulu.....	74
MUTU 22	Ziwiya zikhaulitsa banja la a Zinenani .....	78
MUTU 23	Kuoloka msewu .....	82
MUTU 24	Imfa ya mfumu .....	86
MUTU 25	Kubwereza zam'mbuyo ndi kuyesa ophunzira	90
MUTU 26	Kupempha zipangizo zakusukulu .....	92
MUTU 27	Kalulu alephera kukwatira Chiphetsa .....	96
MUTU 28	Banja lathanzi .....	100
MUTU 29	Umodzi.....	104
MUTU 30	Kubwereza zam'mbuyo ndi kuyesa ophunzira	108
MUTU 31	Nthambi ndi agogo ake .....	110
MUTU 32	Maluso aphindu .....	115
MUTU 33	Kubwereza zam'mbuyo ndi kuyesa ophunzira	120






# MUTU 1

## Kondwani ajomba kusukulu

Dziwani mawu awa

jomba nthawi madzulo mwansangala



Chifundo, Elube ndi Kondwani adali mu Sitandade 3 pa sukulu ya Kalimira. Tsiku lina Elube ndi Chifundo anadabwa kuti Kondwani sadabwere kusukulu.

- Chifundo** Wamuona Kondwani?
- Elube** Ayi. Kondwanitu sanabwere lero kusukulu.
- Chifundo** Bwanji tikamuone madzulo tikaweruka?
- Elube** Ukunena zonna. Iye uja sajomba popanda chifukwa.

Nthawi yoweruka itakwana, Chifundo ndi Elube adapita kwa Kondwani. Adamupeza akusewera pafupi ndi nyumba yawo. Anawa adalonjerana mwansangala ndikucheza motere:

- Chifundo** Uli bwanji, Kondwani?
- Kondwani** Ndili bwino, kaya iwe?
- Elube** Aa! Timaganiza kuti ukudwala.
- Kondwani** Ayi, ndinakaonera kanema.
- Chifundo** Kujomba kusukulu chifukwa cha kanema?
- Elube** Anzako taphunzira za mayina.  
Akadzabwera pamayeso udzalakwa.
- Kondwani** Mpaka kulakwa? Basi sindidzajombanso.

## **Mafunso**

Yankhani mafunso otsatirawa.

- 1 Tchulani anzake awiri a Kondwani.
- 2 Ndi chifukwa chiyani Chifundo ndi Elube adapangana zopita kunyumba kwa Kondwani?
- 3 Ndi chifukwa chiyani Kondwani adajomba kusukulu?
- 4 Tchulani zifukwa zina zomwe ana amajombera kusukulu.
- 5 Kodi n'chifukwa chiyani sukulu ili yofunika?

## **Ntchito A Kuchita sewero**

Chitani sewero la malonje akunyumba omwe mwawerenga.

## **Ntchito B Kutsiriza ziganizo**

Tsirizani ziganizo zotsatirazi polemba mawu awa m'mipata yoyenera.

**timaphunzira  
umabwereza**

**kujomba  
bwanji**

**bwino  
kawirikawiri**

## **Chitsanzo**

Iye amabwera kuno\_\_\_\_\_ .

Iye amabwera kuno kawirikawiri.

1 Tili \_\_\_\_\_, kaya inu?

2 Si bwino \_\_\_\_\_ kusukulu.

3 Ukalephera mayeso, \_\_\_\_\_ kalasi lomwelo.

4 Kodi ndiyende \_\_\_\_\_ kuti ndikafike kusukulu?

5 Kusukulu \_\_\_\_\_ kuwerenga.



## MUTU 2 Kusamalira thupi

Dziwani mawu awa

ukhondo

mswachi

samba

tsitsi



Potsekulira sukulu, a Kaphwiti, mphunzitsi wamkulu wapasukulu ya Gwauya, anaona ophunzira ena omwe adali ndi tsitsi lalitali. Adaonanso ophunzira ena omwe tsitsi lawo lidali losapesa. Enanso adali ndi litsiro. Padali ophunzira mmodzi yemwe izi zidamukhudza kwambiri. Iye adali ndi tsitsi lomwe linkamuvuta kupesa.

A Kaphwiti ataona izi, adalangiza ophunzira onse kuti azisamalira matupi awo. Adawauza kuti azimeta tsitsi likakula komanso kuti azilipesa. Iwo adawauza kuti aziwenga zikhadabo komanso azitsuka mano awo ndi mswachi.

Pomaliza, a Kaphwiti adati, “Mukatsatira zimenezi, mudzakhala aukhondo. Mudzapewa matenda monga a maso, mphere ndi chiseyeye.”

Wophunzira uja ataweruka kusukulu, adauza amayi ake za malangizo omwe adawauza aphunzitsi. Iwo adapita naye kokametetsa. Iyeyo adasangalala kwambiri.

## Mafunso

Yankhani mafunso otsatirawa.

- 1 Tchulani dzina la sukulu yomwe a Kaphwiti ankaphunzitsapo.
- 2 Fotokozani njira ziwiri zomwe mungatsate posamalira thupi.
- 3 Ndi ubwino wotani womwe ophunzira mmodzi anaueza atameta tsitsi?
- 4 Fotokozani matenda omwe munthu wosasamba angadwale.
- 5 Kodi mawu oti *chiseyeye* munkhaniyi akutanthauza chiyani?

## **Ntchito A Kupereka matanthauzo a zilapi/ ndagi**

Pezani matanthauzo a zilapi zotsatirazi kuchokera pagulu la mawu awa.

**nkhono  
bowa**

**mtedza  
lamba**

**dzira  
nzimbe**

**Chitsanzo** Nyumba yanga yopanda khomo.

**Yankho dzira**

- 1 Zungulira uku tikumane uko.
- 2 Ndimayenda ndi nyumba yomwe.
- 3 Nyumba ya amayi ya mzati umodzi.
- 4 Ndanyamula madzi m'kandodo.
- 5 Bokosi la amfumu lotsekula ndi zala.

## **Ntchito B Kugwiritsa ntchito malembo aakulu ndi mpumiro**

Lembo lalikulu ndi lembo lomwe limalembedwa kumayambiriro monga kwa mayina a anthu, malo, mitsinje, maiko, nyanja ndi mapiri. Lemboli limalembewanso kumayambiriro kwa chiganizo.

Mpumiro (.) ndi chizindikiro chomwe chimasonyeza kupuma pomalizira pa chiganizo. Mawu otsatira chizindikirochi amayamba ndi lembo lalikulu.

Lembani malembo aakulu ndi mpumiro m'ziganizo zotsatirazi.

**Chitsanzo** uyu sadapese tsitsi

**Yankho** Uyu sadapese tsitsi.

- 1 tione amakonda kudzisamalira
- 2 agogo akuchapa zovala mu mtsinje wa domasi
- 3 sukulu ya gwauya ndi yokongola
- 4 dziko la malawi ndi lamtendere
- 5 phiri la dedza ndi lalikulu



## MUTU 3 Gwape achititsa msonkhano

Dziwani mawu awa

chonde      kasakaniza      mlangizi      mbewu



Kalekale Nyani adali mlimi m'dera la a Chipembere. Iye pamodzi ndi alimi ena ambiri am'derali ankalima chimanga chokhachokha. Alimiwo sankakolola zochuluka. Maanja awo ankavutika ndi njala chaka chilichonse. Mlangizi wam'derali, Gwape, ataona izi, adaganiza zochititsa msonkhano wa alimi onse

a m'dera la a Chipembere. Kumsonkhanoku kudabwera alimi ochokera m'midzi yonse yam'derali.

Gwape adati, "Mabwana ndi madona, ine ndabwera pa nkhanu ya ulimi wakasakaniza. Ndithokoze kuti nonse m'dera lino mumalimbikira ulimi koma vuto ndi loti simukolola zochuluka. Izi zimachitika chifukwa chakuti mumalima mbewu imodzi. Ndi bwino kuti muyambe ulimi wakasakaniza. Ulimiwu ndi wopindulitsa. Mbewu imodzi ikavuta, mumadalira mbewu ina. Komanso mbewu zina zimabweretsa chonde m'nthaka." Adatsiriza motero Mlangizi Gwape. Kenaka, onse adaomba m'manja.

Nyani adatsatira zomwe Mlangizi Gwape adanena. Iye adakolola zochuluka. Adasangalala kwambiri ndipo adaganiza zochita phwando. Omwe adaitanidwa adadya ndi kumwerera mpakana madzulo. Mwezi udawala ndipo nthawi idakwana yovina magule osiyanasiyana. Timba atalowa m'bwalo, adavina mochititsa chidwi kuposa nyama zonse. Dansi ili pafupi kutha, Timba adathyoka mwendo.

## **Mafunso**

Yankhani mafunso otsatirawa.

- 1 Kodi Nyani ankakhala kuti?
- 2 Ndi chifukwa chiyani banja la Nyani linkavutika ndi njala?
- 3 Tchulani yemwe wakusangalatsani mu nkhaniyi ndi kupereka zifukwa zake.
- 4 Ndi chifukwa chiyani Nyani adachita phwando?
- 5 Fotokozani zomwe mukadachita mukadakolola mbewu zambiri.

## Ntchito A Kulemba ziganizo

Lembani chiganizo chimodzi chofotokoza zomwe zikuchitika m'zithunzi zotsatirazi.

### Chitsanzo



**Yankho** Mnyamata akulima.

1



Yankho

2



Yankho

---

3




Yankho

---

## Ntchito B Kufotokoza ubwino wa ulimi wakasakaniza

Lembani mfundu zokhudza ubwino wa ulimi wakasakaniza m'mabokosi otsatirawa.





## MUTU 4 Malamulo apasukulu

Dziwani mawu awa

mvera

mwachangu

mfolo

mphunzitsi



Malamulo apasukulu

Ndiyankhula ndi anyamata ndi asungwana inu

Amene muli pasukulu pano

Kodi malamulo apasukulu mukuwadziwa?

Indetu ndiyankhula ndi ophunzira inu  
Muzibwera mwachangu kusukulu  
Muzisamala katundu wasukulu  
Awatu ndi ena mwa malamulo *apasukulu*.

Ophunzira inu tamverani  
Muzilemekeza *aphunzitsi*  
Muzivala yunifomu nthawi zonse  
Awano ndi ena mwa malamulo *apasukulu*.

Muzipita pamfolo mwachangu  
Mukamva beru *ngo ngo ngo*  
Ilinso ndi lamulo lofunika pasukulu  
Mukatero, mudzakhala ophunzira abwino.

## **Mafunso**

Yankhani mafunso otsatirawa.

- 1 Kodi uthenga wa malamulo *apasukulu* ukupita kwa yani?
- 2 Perekani malamulo awiri *apasukulu*.
- 3 Kodi mukuganiza kuti akuyankhula mu ndakatuloyi ndani?
- 4 Fotokozani ubwino wosamalira katundu wa sukulu.
- 5 Kodi mukuganiza ndi chifukwa chiyani ana asukulu ayenera kuvala yunifomu?

## **Ntchito A Kulakatula**

Lakatulani ndakatulo ya Malamulo apasukulu.

## **Ntchito B Kupereka mawu otsutsana m'matanthauzo**

Sankhani mawu otsutsana m'matanthauzo ndi omwe  
ali m'munsiwa kuchokera pagulu la mawu awa.

**ukhondo  
masana**

**mnyamata  
dwala**

**mchedwa  
tsopano**

**Chitsanzo kale**

**Yankho tsopano**

1 mofulumira \_\_\_\_\_

2 chira \_\_\_\_\_

3 uve \_\_\_\_\_

4 usiku \_\_\_\_\_

5 mtsikana \_\_\_\_\_



## MUTU 5

**Kubwerezam'mbuyo  
ndikuyesa ophunzira**

### Ntchito A Kufotokoza zochita posamalira thupi

Lembani zimene mumachita posamalira thupi m'mabokosi otsatirawa.



### Ntchito B Kupereka matanthauzo a zilapi/ndagi

Pezani matanthauzo a zilapi zotsatirazi kuchokera pagulu la mawu awa.

**ng'oma  
nkhumba**

**lirime  
mphero**

**ndevu  
chikope**

**Chitsanzo** Udzu wamera pathanthwe.

**Yankho** ndevu

- 1 Ndikadzafa ndidzayera.
- 2 Diwa lam'nsenjere kugwaigwa.
- 3 Walira wopanda matumbo.
- 4 Dziwe umo, koma mlamba umodzi.
- 5 Make mbu, mwana mbu.

### **Ntchito C Kugwiritsa ntchito malembo aakulu ndi mpumiro**

Lembani malembo aakulu ndi mpumiro m'malo oyenera m'ziganizo zotsatirazi.

**Chitsanzo** ndibwera ndi a konyani

**Yankho** Ndibwera ndi a Konyani.

- 1 bambo mwale akumwa madzi
- 2 mswachi wanga wathyoka
- 3 abwera akamaliza kulemba mayeso
- 4 zakaliya wapita ku lilongwe
- 5 nsapato ya tinyade yasowa



## MUTU 6

## Kugwira ntchito zofanana

Dziwani mawu awa

ntchito

tchetcha

mgwirizano

gwira



Mu mzinda wa Kaluzi mudali sukulu yotchedwa Kauwa. Ophunzira apasukulupa ankagwira ntchito mwamgwirizano.

Tsiku lina, aphunzitsi a Sitandade 3 adaitana Sekani, mtsogoleri wa kalasili.

- |                   |                                                                                           |
|-------------------|-------------------------------------------------------------------------------------------|
| <b>Mphunzitsi</b> | Kunja kwa kalasi lathu kwawirira.                                                         |
| <b>Sekani</b>     | Zoonadi. Tikuyenera kutchetcha ndi kulambulako.                                           |
| <b>Mphunzitsi</b> | Wanena bwino. Ugawe ntchito kwa anzako.                                                   |
| <b>Sekani</b>     | Ndamva aphunzitsi.                                                                        |
| <b>Mphunzitsi</b> | Pogawa, anyamata ndi atsikana apatsidwe ntchito zofanana.                                 |
| <b>Sekani</b>     | Kodi atsikana angathe kutchetcha?                                                         |
| <b>Mphunzitsi</b> | Eee! Aliyense angathe kugwira ntchito ina iliyonse.                                       |
| <b>Sekani</b>     | Chabwino aphunzitsi. Angapo atchetcha kuseri kwa kalasi, ena alambula ndi kubzala maluwa. |
| <b>Mphunzitsi</b> | Wagawa bwino.                                                                             |
| <b>Sekani</b>     | Zoonadi, anyamata ndi atsikana tiyenera kugwira ntchito zofanana.                         |

## **Mafunso**

Yankhani mafunso otsatirawa.

- 1 Tchulani dzina la sukulu yomwe inkapezeka mu mzinda wa Kaluzi.
- 2 Kodi mtsogoleri wa m'Sitandade 3 dzina lake lidali yani?
- 3 Fotokozani ntchito ziwiri zomwe ophunzira ankagwira pasukulupo.
- 4 Kodi inu mumagwira ntchito zotani kunyumba kwanu?
- 5 Kodi mukuganiza kuti ubwino wogwira ntchito zofanana pakati pa anyamata ndi atsikana ndi wotani?

## **Ntchito A Kupereka matanthauzo a zilapi/ndagi**

Pezani matanthauzo a zilapi zotsatirazi kuchokera pagulu la mawu awa.

**tambala  
kabichi**

**njira  
akhwangwala**

**utsi  
malambe**

**Chitsanzo** Mpaliro watulukira kutsindwi.

**Yankho** utsi

- 1 Nyumba ya mfumu yapsa, mtanda watsala.

- 2 Amalira atadzimenya.
- 3 Agogo anga ali ndi imvi m'mimba.
- 4 Asirikali ovala zoyer a m'khosi.
- 5 Mwana wamng'onong'ono zovala phwii.

## **Ntchito B Kupereka mawu ofanana m'matanthauzo**

Sankhani mawu ofanana m'matanthauzo ndi mawu omwe ali m'munsiwa.

<b>dabwa</b>	<b>utchisi</b>	<b>kondwa</b>
<b>mgwirizano</b>	<b>wopepera</b>	<b>bala</b>

**Chitsanzo** chilonda

**Yankho** bala

- 1 uve
- 2 mvano
- 3 sangalala
- 4 wopusa
- 5 zizwa



## MUTU 7

# Zochitika m'mudzi mwa a Chewe



Dziwani mawu awa

likhweru

fiyo

msika

kwera



Mudzi wa a Chewe ndi wochititsa kaso. Anthu ake ndi akhama. Amagwira ntchito zosiyanasiyana monga zaulimi ndi zamalonda. Ambiri ali ndi minda, zifuyo, ngolo, njinga zakapalasa, njinga zamoto ndi galimoto.

Anthu am'mudzimu amalawirira kukagwira ntchito zaho. Akangomva kuti kokoliriko m'mawa, amadziwa kuti kunja kwacha. Aliyense amathamangira ku ntchito yake. Alimi amamveka *go, go, go*, kukandula makasu. Ku misasa ya amisiri okhoma zidebe kumamveka kuti *kho, kho, kho*. Abusa a zifuyo sasowa akadzuka. Iwo amaliza malikhweru kuti *fijo* kukusa zifuyo zaho. Zifuyo zina zimamveka kuti *mee, mee* ndipo zina zimati *moo, moo*.

Anthu ambiri amapita ku msika kukagulitsa ndi kukagula zinthu. Ochita malonda amatanganidwa. M'mawa galimoto zimamveka kuti *vimuu, pipii, pipii* kukonzekera kutenga anthu. Oyendetsa njinga zakapalasa amaitanira okwera. Amaliza maberu kuti *nginde, nginde, nginde*. Ena amakwera ngolo zokokedwa ndi abulu. Anthu am'mudzi mwa a Chewe amakhala otanganidwa nthawi zonse.

## Mafunso

Yankhani mafunso otsatirawa.

- 1 Kodi dzina la mudzi womwe watchulidwa mu nkhaniyi ndi chiyani?
- 2 Tchulani ntchito ziwiri zomwe anthu am'mudzimu amagwira.
- 3 Kodi anthu oyendetsa njinga zamatola amaitanira bwanji okwera?
- 4 Fotokozani ubwino wogwira ntchito molimbika.

- 5 Ndi chifukwa chiyani m'mudzimu mumamveka phokoso la zinthu zosiyanasiyana?

### Ntchito A Kupanga mawu

Pangani mawu asanu pogwiritsa ntchito maphatikizo omwe ali m'mabokosi otsatira.

**Chitsanzo** msi ka

**Yankho** msika

msi	nde	ra	li	to
nji	<b>ka</b>	nga	ru	kho
ntchi	khwe	ma	kwe	ngi

### Ntchito B Kufotokoza ntchito zomwe anthu amagwira

Tchulani ntchito zisanu zomwe anthu am'dera lanu amagwira.

**Chitsanzo**

Kukhoma zidebe

- 1 \_\_\_\_\_
- 2 \_\_\_\_\_
- 3 \_\_\_\_\_
- 4 \_\_\_\_\_
- 5 \_\_\_\_\_



## MUTU 8

### Kupewa ngozi zapakhomo

Dziwani mawu awa

nkhwangwa

mpeni

zakuthwa

pweteka



M'banja la a Betha mudali ana awiri. Mayina awo adali Ganizo ndi Dalitso. Anawa adali amakhalidwe abwino. Pakhomo pa a Betha padali mitengo ya zipatso monga mango, gwafa ndi peyala. Ganizo ndi Dalitso akaweruka kusukulu, ankakonda

kukwera m'mitengo ndi kuthyola zipatso. Izi sizinkakondweretsa makolo awo.

Tsiku lina a Betha adaitana ana awo ndi kuwalangiza motere:

“Ana inu, musamakonde kukwera m'mitengo kupewa kuti mungadzagwe ndi kupweteka. Pakhomo pano palinso nkhwangwa, zikwanje, makasu ndi mipeni. Zipangizozi ndi zakuthwa. Muzisamala mukamazigwiritsa ntchito.”

Kuonjezera apo, a Betha adauza anawo kuti asamasewere pafupi ndi moto. Ganizo ndi Dalitso adalonjeza kuti adzatsatira malangizowo pofuna kupewa ngozi zapakhomo.

## Mafunso

Yankhani mafunso otsatirawa.

- 1 Tchulani mayina a ana a Betha?
- 2 Kodi ndi mitengo yanji ya zipatso yomwe idali pakhomo pa a Betha?
- 3 Ndi chifukwa chiyani a Betha adalangiza ana awo kuti asamakwere m'mitengo?
- 4 Fotokozani kuopsa kosewera pafupi ndi moto.
- 5 Kodi malangizo amatithandiza bwanji pa moyo wathu?

## **Ntchito A Kupanga ziganizo**

Pangani ziganizo ndi mawu ali m'munsimu.

**Chitsanzo** Kwera

**Yankho** Ife timakwera m'mitengo yamango.

- 1 pweteka
- 2 nkhwangwa
- 3 zakuthwa
- 4 pewa
- 5 mpando

## **Ntchito B Kuzindikira mayina**

Dzina ndi mawu wotchulira kapena kuitanira chinthu chamoyo kapena chopanda moyo, chooneka kapena chosaoneka, chokhudzika kapena chosakhudzika.

Pezani mayina asanu kuchokera mu ndime yoyamba ya nkhani yomwe mwawerenga.

**Chitsanzo** banja, Betha

- 1 \_\_\_\_\_
- 2 \_\_\_\_\_
- 3 \_\_\_\_\_
- 4 \_\_\_\_\_
- 5 \_\_\_\_\_



## MUTU 9 Nkhalango yathu

Dziwani mawu awa

nkhalango

tchire

bzala

nyama



Nkhalango yathu iwe!

Udali ndi zipatso zosiyanasiyana

Nthudza, katope ndi maula tinkadya kwa iwe

Nanga mitengo yako idapita kuti?

Nkhalango yathu iwe!  
Udali ndi nyama zosiyansiyana  
Akalulu, agwape, nkhanga zinkabisala mwa iwe  
Nanga lero nyamazi zikubisala kuti?

Nkhalango yathu iwe!  
Nanga tichite chiyani kuti ubwerere mwakale?  
Kubzala mitengo, kusatentha tchire  
Ndi zina mwa njira zokubwezeretsera

Nkhalango yathu iwe!  
Kudula mitengo mwachisawawa taleka  
Kupha nyama popanda chilolezo sitidzachitanso  
Pakuti izi iwe umadana nazo

## Mafunso

Yankhani mafunso otsatirawa.

- 1 Tchulani zipatso ziwiri zomwe zatchulidwa mu ndakatuloyi.
- 2 Kodi nkhalango tingaibwezeretse bwanji?
- 3 Kodi mawu woti “iwe” m’ndime yoyamba akuimira chiyani mu ndakatuloyi?
- 4 Tchulani adani awiri a nkhalango.
- 5 Kodi mukuganiza kuti ubwino wolimira kanjira m’mbali mwa nkhalango ndi chiyani?

## Ntchito A Kuzindikira mayina

Tsekani mzere kensi kwa mayina m'ziganizo zotsatirazi.

**Chitsanzo** Lekani kutentha tchire.

**Yankho** Lekani kutentha tchire.

- 1 Titeteze nkhalango yathu yokondedwa.
- 2 Tisadule mitengo mwachisawawa.
- 3 Moto wolusa ndi woopsa.
- 4 Ena amakonda nthudza.
- 5 Iye amayenda ndi Lute.

## **Ntchito B Kufotokoza zotsatira za mchitidwe woipa**

Lembani zotsatira za mchitidwe woipa wokhudza nkhalango.

Mchitidwe	Zotsatira zake
<b>Chitsanzo</b> Kupha nyama kopanda chilolezo	<b>Yankho</b> 1 Nyama zimatha
Kutentha tchire	1 _____ 2 _____
Kudula mitengo mwachisawawa	1 _____ 2 _____



## MUTU 10

Kubwerezam'mbuyo  
ndikuyesa ophunzira

### Ntchito A Kulemba zotsatira za mchitidwe wosiyanasiyana

Lembani zotsatira za mchitidwe uli m'munsiwu.

Mchitidwe	Zotsatira zake
Kukwera mumtengo	kuvulala
1 Kusewera pafupi ndi moto	
2 Kusewera mumtsinje	
3 Kuseweretsa mpeni kapena lezala	
4 Kumwa kapena kudya zinthu zosazidziwa	
5 Kuyatsa machesi	

### Ntchito B Kutsiriza zifanifani

Tsirizani zifanifani zotsatirazi ndi mawu awa.

fisi  
mafulufute

kalulu  
mavu

akakowa  
nsima

**Chitsanzo** Kuyera ngati \_\_\_\_\_.

**Yankho** Kuyera ngati akakowa.

1 Kuning'a pamimba ngati \_\_\_\_\_.

2 Kupusa ngati \_\_\_\_\_.

3 Kuda ngati \_\_\_\_\_.

4 Kuchenjera ngati \_\_\_\_\_.

5 Kuyenda usiku ngati \_\_\_\_\_.

### Ntchito C Kuzindikira mayina m'ziganizo

Tsekani mzere kunsi kwa mayina m'ziganizo zotsatirazi.

**Chitsanzo** Galu amawuwa usiku.

**Yankho** Galu amawuwa usiku.

1 Mfumu yathu yabwera.

2 Ife taima pamfolo.

3 Kadzidzi akulira.

4 Chikho changa chasweka.


5 Ulemu ndi wofunika.



## MUTU 11 Atsogoleri am'kalasi

Dziwani mawu awa

mtsogoleri chisankho kondera nkhanza



Ophunzira apasukulu ya Chambo adali ndi chisankho cha atsogoleri am'kalasi mwawo. Aphunzitsi awo adachititsa msonkhano wa chisankhocho motere:

- Mphunzitsi** Ino ndi nthawi yoti tisankhe mtsogoleri ndi wachiwiri wake m'kalasi muno. Kodi mtsogoleri wabwino amakhala wotani?
- Alinafe** Amayenera kukhala yemwe sajombajomba kusukulu, wachikondi komanso woleza mtima.
- Mphunzitsi** Maganizo ena?
- Zakeyo** Akhalenso wosakondera, wopanda nkhanza ndi waulemu.
- Mphunzitsi** Eya. Tikamasankha atsogoleriwa, tiyang'ane omwe ali ndi makhalidwe omwe tatchulawa. Tsopano tiyeni tichite chisankho. Ndilemba mayina a anthu amene mukuwaganizira pabolodi. Tsopano tchulani mayinawo.
- Chikondi** Ine ndikufuna kuti mtsogoleri akhale mnzanga.
- Mphunzitsi** Zikomo chifukwa cha maganizo ako. Koma posankha tikumbukire zomuyenereza zomwe takambirana zija.

Ophunzira aja adatchula mayina. Pomaliza, chisankhochi Malita adamusankha kukhala mtsogoleri. Wachiwiri wake adasankha Alinafe.

## **Mafunso**

Yankhani mafunso otsatirawa.

- 1 Ndani adatsogolera chisankho cha atsogoleri am'kalasi?
- 2 Kodi Alinafe adati mtsogoleri ayenera kukhala wotani?
- 3 Tchulani mayina a ophunzira omwe adasankhidwa pa chisankhochi.
- 4 Fotokozani ubwino wokhala ndi atsogoleri am'kalasi.
- 5 Tchulani ntchito za atsogoleri am'kalasi.

## **Ntchito A Kuzindikira mayina amwinimwini**


Dzina lamwinimwini ndi dzina lotchulira munthu, malo komanso chinthu ndipo limayamba ndi lembo lalikulu.

Pezani mayina anayi amwinimwini kuchokera m'macheza omwe mwawerenga.

**Chitsanzo      Chambo**

## Ntchito B Kutsiriza kangaude wa mawu

Tsirizani kangaude wa mawu wotsatirayu polemba makhalidwe amtsogoleri wabwino wam'kalasi.





## MUTU 12 Kusamala zovala

Dziwani mawu awa

chapa

chingwe

nsabwe

litsiro



Tsiku lina kusukulu, Yankho adaona nsabwe pa malaya a mnzake. Izi zidamudabwitsa kwambiri popeza adali asadazionepo. Yankho atapita kunyumba, anapeza amayi ake akuchapa.

- Yankho** Amayi, lero kusukulu ndaona nsabwe pa malaya a mnzanga.
- Mayi** Aa! Kodi nsabwe zikadalipobe?
- Yankho** Eya, ambiri tinadabwa titaona nsabwezo. Timafunsana chomwe chimabweretsa nsabwe ndi chiyani.
- Mayi** Mwanawe, nsabwe zimadza chifukwa cha kusasamba ndi kusachapa zovala. Kodi mnzakoyo amaoneka bwanji?
- Yankho** Ayi. Iyeyo amaoneka wosasamba.
- Mayi** Eyatu. Zovala zosachapa zimakhala ndi litsiro lomwe likhoza kubweretsa nsabwe. Nsabwe zimaluma komanso zimayamwa magazi.
- Yankho** Kodi amayi, kusamba ndi kuchapa ndi njira zokhazo zomwe tingathetsere nsabwe?
- Mayi** Ayi. Nthawi zonse tikachapa zovala tiyenera kuziyanika pa chingwe. Kenaka tiyenera kuzisita, kuzipinda ndi kuziika pamalo osamalika.
- Yankho** Ndamva amayi.

## **Mafunso**

Yankhani mafunso otsatirawa.

- 1 Kodi Yankho amakhala kuti?
- 2 Ndi chifukwa chiyani Yankho adadabwa ataona nsabwe?
- 3 Kodi chimabweretsa nsabwe ndi chiyani?
- 4 Fotokozani momwe mungasamalire zovala zanu.
- 5 Tchulani njira zina zothetsera nsabwe.

## **Ntchito A Kusanja ziganizo**

Sanjani ziganizo zotsatirazi mu ndondomeko oyenera.

- 1 Zovalazo amayanika pachingwe.
- 2 Iwo amachapa zovala zawo.
- 3 Pomaliza, amazipinda ndi kuzisunga m'chikwama.
- 4 Zovala zikauma amazisita.
- 5 Amasankha zovala zonse zakuda.

## **Ntchito B Kugwiritsa ntchito mfunsiro kapena mpumiro**

Mfunsiro (?) ndi chizindikiro chomwe chimasonyeza kufunsa m'chiganizo.

Lembani mfunsiro kapena mpumiro m'ziganizo zotsatirazi pamalo oyenera.

**Chitsanzo** Kodi Mwayi amakhala kuti

**Yankho** Kodi Mwayi amakhala kuti?


- 1 Yankho amaphunzira pa sukulu ya Mtondo
- 2 Uli bwanji, Patuma
- 3 Tamara ndi Themba amayendera limodzi
- 4 Kodi madzi ndi wofunika bwanji
- 5 Ine ndimakonda kumvetsera nthano



# MUTU 13 Mudzi wachitsanzo

Dziwani mawu awa

zipembedzo madyerero chimera mwambo



Kalekale m'dera la Nyenyeswa mudali mudzi wa Majawa. Mudziwo udali wachitsanzo. Anthu ake adali azipembedzo zosiyana siyana monga Chisilamu, Chikhirisitu ndi Chamakolo. Ngakhale anthuwa adali osiyana zipembedzo, ankagwirizana pochita zinthu.

Pakakhala ukwati, matenda kapena maliro, anthuwa ankachita zinthu mosayang'ana zipembedzo.

Tsiku lina, m'mudzimu mudali ukwati. Pokonzekera ukwatiwu, anthu adabweretsa zinthu monga chimera chophikira thobwa, ndiwo ndi zakudya zina. Munthu wina adapereka galimoto kuti idzanyamule akwati popita kodalitsa ukwati.

Pa tsiku lachikondwerero padali madyerero, zoyankhula ndi magule. Ku ukwatiwu kudabwera anthu ambiri ochokera kutauni ndi kumadera ozungulira mudziwu.

Madyerero ali m'kati, woyendetsa mwambo adapempha Mfumu Majawa kuti ayankhule.

A mfumu *adayankhula* kuti, “Zikomo amayi ndi abambo. Ndaima pano ndi chimwemwe chodzadza tsaya. Poyamba, ndikufuna kuthokoza akwatiwa potibweretsa pano. Izi zasonyeza kuti iwowa ndi omvera komanso osunga mwambo. Ine ngati mfumu, ndikupempha kuti mgwirizano ngati umenewu upitirire. Ndikukumbutsanso atsogoleri azipembedzo zonse monga abusa, ashehe ndi ena kuti apitirize kulimbikitsa mgwirizanowu.”

Zitatha zoyankhula, padavinidwa magule osiyanasiyana. Aliyense adavina gule wa kumtima kwake.

## Mafunso

Yankhani mafunso otsatirawa.

- 1 Tchulani zipembedzo ziwiri zomwe zidali m'mudzi mwa a Majawa.
- 2 Ndani adapempha amfumu kuti ayankhule?
- 3 Tchulani ena mwa madyerero omwe amachitika m'dera lanu.
- 4 Kodi mawu oti 'chodzadza tsaya' akutanthauza chiyani mu nkhaniyi?
- 5 Fotokozani ubwino wa mgwirizano pakati pa anthu osiyana zipembedzo m'mudzi.

## Ntchito A Kupanga mawu

Pangani mawu asanu ndi maphatikizo omwe ali m'bokosimu.

**Chitsanzo**      tsa ya

**Yankho**      tsaya

ya	nthu	ntchi	da
chi	ma	ra	li
me	mfu	mbo	mwa
mu	to	nse	tsa

## Ntchito B Kutsiriza kalozera wa mfundo

Lembani mfundo zitatu zosonyeza kuti anthu am'mudzi mwa a Majawa adali ogwirizana.

Mgwirizano wa anthu am'mudzi mwa a Majawa

Amachitira zinthu izi limodzi

1

2

3



## MUTU 14

Malingaliro  
am'tsogolo

Dziwani mawu awa

namwino mphunzitsi malingaliro katswiri



Melifa, Lameki ndi Chisomo adali mu Sitandade 3. Iwo ankachokera m'mudzi umodzi. Anawa sankachita bwino pa maphunziro awo chifukwa ankabwera kusukulu mochedwa. Chifukwa chinango n'chakuti, iwowa ankakonda kujomba tsiku lamsika.

Tsiku lina mphunzitsi wawo, Bambo Chizenga, adapempha makolo a anawo kuti akacheze nawo kunyumba kwawo. Atafika, makolo a anawa adawalandira mwansangala. Aphunzitsiwa adati, “Ndabwera kudzawalimbikitsa anawa pa maphunziro awo.”

Atatero, a Chizenga adafunsa aliyense kuti apereke malingaliro aka am’tsogolo. Melifa adafotokoza kuti amafuna adzagwire ntchito ya usirikali. Iye adati, amasirira asirikali akamaguba. Chisomo amafuna kudzakhala mphunzitsi. Iye amasirira aphunzitsi akamalemba pabolodi. Lameki adafotokoza kuti amafuna ntchito ya unamwino. Iye amasirira anamwino akavala yunifomu yoyer a komanso akamathandiza odwala.

Mphunzitsiyu atamva izi adati, ‘Nonse muli ndi malingaliro abwino.’ Iye adawalimbikitsa kuti ayenera kulimbikira maphunziro. Asamajombe kapena kuchedwa kusukulu. Adatinso, akalimbikira maphunziro, adzakhala odzidalira.

Masiku otsatira, anawo adayamba kupita kusukulu mokhulupirika. Adayambanso kukhoza m’kalasi ndipo onse adakwaniritsa kukhala akatswiri pa ntchito za malingaliro awo.

## **Mafunso**

Yankhani mafunso otsatirawa.

- 1 Tchulani dzina la aphunzitsi a Sitandade 3.
- 2 Ndani ankasirira yunifomu ya anamwino?
- 3 Mukuganiza kuti anawa amajomberanji kusukulu tsiku lamsika?
- 4 Fotokozani ntchito yomwe inu mumafuna kudzagwira.
- 5 Perekani malangizo awiri okhudza sukulu omwe makolo anu amakupatsani.

## **Ntchito A Kupanga ziganizo**

Pangani ziganizo zomveka bwino ndi mawu otsatirawa.

### **Chitsanzo jomba**

**Yankho** Ana onse ojomba kusukulu anapatsidwa chibalo.

- 1 namwino
- 2 malingaliro
- 3 ntchito
- 4 silira
- 5 limbikira

## Ntchito B Kuzindikira a lowam'malo

Mlowam'malo ndi mawu amene amagwira ntchito m'malo mwa dzina.

Lembani mzere kunsi kwa a lowam'malo m'ziganizo zotsatirazi.

**Chitsanzo** Iye amawerenga kwambiri.

**Yankho** Iye amawerenga kwambiri.

- 1 Iwo ankakonda kujomba kusukulu.
- 2 Melifa ndi ine tipita kwathu.
- 3 Zanga sindikuziona.
- 4 Lameki apita ndi inu.
- 5 Iwe, tadzuka ungachedwe kusukulu.



## MUTU 15

Kubwereza zam'mbuyo  
ndi kuyesa ophunzira

### Ntchito A Kuzindikira mayina amwinimwini

Tsekani mzere kensi kwa mayina amwinimwini  
m'ziganizo zotsatirazi.

**Chitsanzo** Malita akusesa panja.

**Yankho** Malita akusesa panja.

- 1 Chikondi ndi wofatsa kwambiri.
- 2 Shire ndi mtsinje waukulu.
- 3 Mawa ndipita ku Mangochi.
- 4 Mzuzu ndi mzinda wokongola.
- 5 Ife timaphunzira Chichewa.

### Ntchito B Kupereka ziganizo zotsutsana m'matanthauzo

Sankhani ziganizo za mu B zomwe zikutsutsana  
m'matanthauzo ndi za mu A.

**Chitsanzo** Iye ndi mtsikana.

**Yankho** Iye ndi mnyamata.

A	B
1 Iye ndi mtsikana.	1 Tadala, masula chingwe.
2 M'kalasi muli phokoso.	2 Ena adalephera.
3 Ena adapambana.	3 Maria ndi wauve.
4 Dali ali ndi khaldwe labwino.	4 Iye ndi mnyamata.
5 Tadala, manga chingwe.	5 Dali ali ndi khaldwe loipa.
6 Maria ndi waukhondo.	6 M'kalasi muli bata.

## Ntchito C Kutsiriza ziganizo ndi alowam'malo

Tsirizani ziganizo zotsatirazi ndi alowam'malo ali m'munsimu.

*awiri  
icho*

*wanga  
iwe*

*nonse  
ife*

**Chitsanzo** \_\_\_\_\_ okha alephera mayeso.

**Yankho** Awiri okha alephera mayeso.

1 Yang'anani kuno \_\_\_\_\_.

2 \_\_\_\_\_, bwera kuno.

3 Changa ndi \_\_\_\_\_.

4 \_\_\_\_\_ tasangalala pokuonani.

5 \_\_\_\_\_ adabwera dzulo.



## MUTU 16 Masewera a ana

Dziwani mawu awa

mphotho

ntchedzero

bawo

jingo



M'dera la Kayimbi mudali sukulu yotchedwa Mpamadzi. Ophunzira apasukulupa ankakonda kusewera nthawi yopuma. Iwo ankasewera bawo ndi mpira. Nthawi zina ankaponyerana zifanifani ndi kuimba nyimbo. Lola ndi m'bale wake, Pempho, ankaphunzira pasukuluyi. Iwo adali mu Sitandade 3. Tsiku lina, Lola ndi Pempho ankasewera. Aphunzitsi awo adachita chidwi ndi masewerawo.

- Mphunzitsi** Ndi masewera anji mukuchitawa?
- Lola** Tikusewera bawo.
- Mphunzitsi** Ndani adakuphunzitsani masewerawa?
- Lola** Anzathu ena pasukulu pompano.
- Mphunzitsi** Chabwino. Palinso masewera ena omwe mumawakonda?
- Pempho** Eya. Timakondanso kusewera jingo ndi mpira wamiyendo kuti tizilimbitsa matipi.
- Mphunzitsi** Pempho ndi anzako mukonzekere. Mawa mudzasewera mpira ndi a Sitandade 4.
- Pempho** Takonzeka ndipo tapeza kale nsapato zosewerera mpira.
- Tsiku lotsatira, ophunzira amakalasi awiriwa adasewera mpira. Ophunzira a Sitandade 3 adagonjetsa a Sitandade 4 ndi zigoli zitatu kwa chimodzi. Zigolizi adagoletsa ndi Pempho. Aphunzitsi adamupatsa mphotho.

## **Mafunso**

Yankhani mafunso otsatirawa.

- 1 Tchulani dzina la sukulu yomwe ankaphunzirako Pempho.
- 2 Kodi ophunzira ankakonda kuchita masewera anji nthawi yopuma?
- 3 Kodi ndani adapambana pa masewera ampira?
- 4 Ndi chifukwa chiyani masewera ali ofunika?
- 5 Fotokozani ngati aphunzitsi adachita bwino kupereka mphotho kwa Pempho?

## **Ntchito A Kupereka matanthauzo a zilapi/ndagi**

Pezani matanthauzo a zilapi zotsatirazi kuchokera pagulu la mawu awa.

**mtedza  
mvula**

**minga  
tsitsi**

**bowa  
nsima**

**Chitsanzo**              Bokosi lotsekula ndi zala.


**Yankho**              mtedza

- 1 Nyumba yanga ya mzati umodzi.
- 2 Kamwana kakang' onong' ono kaimitsa amfumu panjira.

- 3 Sesani pakhomo padutse a Chimtali.
- 4 Chimunda uko pokolola n'kumanja.
- 5 Phiri lokwera ndi manja.

## Ntchito B Kufotokoza za masewera

Fotokozani masewera omwe mumakonda poyankha mafunso omwe ali m'mabokosimu.





## MUTU 17 Kusamala zakudya


Dziwani mawu awa

ntchentche

tsuka

samba

tenthetsa



Banja la a Soko linkakhala m'mudzi mwa a Ngwata.  
Banjali lidali ndi ana atatu, Chikondi, Tamanda  
ndi Vuto. Iwo ankakonda kuyendera limodzi ngati  
ngumbi. Bambo Soko ankagwira ntchito ya zaumoyo.

Tsiku lina, bambowa adaona ana awo akudya mango osatsuka. Ataona izi, adaitana ana aja ndikuyamba kuwalangiza.

“Ana inu, musamadye zipatso zosatsuka chifukwa zimayambitsa matenda otsekula m’mimba. Komanso musanadye chakudya, muzisamba m’manja. Si bwino kuti m’manja muzida ngati mwa pusi.”

A Soko adafotokozango ubwino wovundikira chakudya. Iwo adati, “Tiyenera kuvundikira bwino chakudya pochiteteza ku fumbi, ntchentche, makoswe ndi mphemvu zomwe zimafalitsa matenda.”

Iwo adatinso, “Tizitenthetsa chakudya chomwe chazizira kapena chagonamo. Si bwino kudya chakudya chozizira. Kutenthetsa chakudya kumathandiza kupha tizilombo toyambitsa matenda.”

Pomaliza adawauza kuti, akaphika zakudya, azisunga mu ziwiya zotsuka bwino.

## Mafunso

Yankhani mafunso otsatirawa.

- 1 Kodi banja la a Soko linkakhala m'mudzi mwa yani?
- 2 Tchulani mayina a ana awiri okha am'banjamu.
- 3 Perekani malangizo awiri omwe mwawerenga m'nhaniyi.
- 4 Fotokozani mmene mungasamalire ndiwo zanyemba zotsalira.
- 5 Fotokozani kufunkika kosamalira zakudya.

## Ntchito A Kutsiriza zifanifani

Tsirizani zifanifani zotsatirazi ndi mawu awa.

kalulu  
fisi

ngumbi  
chule

nyenyezi  
makala

**Chitsanzo** Kuyenda limodzi ngati \_\_\_\_\_.

**Yankho** Kuyenda limodzi ngati ngumbi.

- 1 Kuchenjera ngati \_\_\_\_\_.
- 2 Kuda ngati \_\_\_\_\_.
- 3 Mantha ngati \_\_\_\_\_.
- 4 Kusasa mawu ngati \_\_\_\_\_.
- 5 Kuwala ngati \_\_\_\_\_.

## Ntchito B Kuzindikira aneni

Mneni ndi mawu wosonyeza ntchito kapena kuti zochitika m'chiganizo.

Tsekani mzere kinsi kwa aneni m'ziganizo zili m'munsimu.

**Chitsanzo** Julita akudya zipatso.

**Yankho** Julita akudya zipatso.

- 1 Mnyamata wathyola mango.
- 2 Agogo akhala pamkeka.
- 3 Mayi Maseko anyamula dengu la tomato.
- 4 Ntchentche zimafalitsa matenda.
- 5 Lukiya akupeta chimanga.



## MUTU 18

# Nkhalango yosungira nyama

Dziwani mawu awa

nkhalango      kuteteza      nyalugwe      mkango



A Malefula adali mphunzitsi pa sukulu ya Ngwenya m'boma la Lilongwe. Sukuluyi idali kutali ndi malo osungirako nyama zakutchire.

Tsiku lina a Malefula adaphunzitsa za malo osiyanasiyana osungirako nyama monga Nyika, Kasungu ndi Lengwe. Ophunzira adachita chidwi ndi nkhaniyi. Iwo sadakhulupirire kuti nyama zakuthengo zimasungidwanso.

A Malefula adaganiza zotengera ophunzirawo ku nkhalango yosungirako nyama ya Kasungu. Atafika, adaona nkhalango yowirira. Malowo adazunguliridwa ndi waya wanyesi yamagetsi. Pachipata padali msirikali ovala zobiriwira. Iwo ankateteza nyama kuti anthu asamaziphe.

Mphunzitsi ndi ophunzirawo adalowa m'nkhalangomo pa galimoto motsogozedwa ndi msirikali woyang'anira nkhalango. Adaona njovu, akalulu ndi mbawala zikudya. Ophunzira adachita chidwi poonanso anyani akusewera m'mitengo. Iwo adafunsa ngati mudali nyama zina monga mikango, afisi ndi anyalugwe. Msirikaliyo adawayankha kuti zidalimo, koma zimayenda usiku.

Ulendowo udali wosaiwalika kwa ophunzirawo. Iwo adaphunzirapo kusamalira ndi kuteteza malo osungirako nyama.

## Mafunso

Yankhani mafunso otsatirawa.

- 1 Kodi a Malefula ankaphunzitsa pa sukulu yanji?
- 2 Tchulani malo awiri osungirako nyama.
- 3 Kodi ntchito ya asirikali m'nhalango ndi chiyani?
- 4 Ndi chifukwa chiyani nkhalango ya Kasungu idazunguliridwa ndi waya wa nyesi yamagetsi?
- 5 Nanga ulendowu udawathandiza bwanji ophunzirawo?

## Ntchito A Kuchita sewero Iolemba mawu

Lembani mawu awa m'mipata motsitsa ndi mopingasa potsatira malembo ali m'munsiwa.

alenje  
nkhalango

mkango  
nyani

nyama  
afisi

							4		
<sup>1</sup>	A	F	I	S	I				
						2			
3									

**Chitsanzo** Mopingasa

Nyama zolira kuti uwii. (malembo 5)

**Yankho** afisi

### **Mopingasa**

- 1 Lero tadyera \_\_\_\_\_ ya nkhuku. (malembo 5)
- 2 Malo okhala nyama zakutchire. (malembo 9)

### **Motsitsa**

- 1 Anthu opha nyama zakutchire. (malembo 6)
- 2 \_\_\_\_\_ ali mumtengo. (malembo 5)
- 3 Mfumu yam'nkhalango. (malembo 6)

## Ntchito B Kutsiriza ziganizo ndi afotokozi

Mfotokozi ndi mawu omwe amanena za dzina kapena mlowam'malo.

Tsirizani ziganizo zotsatirazi ndi afotokozi awa.

wanyesi  
zitatu

ambiri  
uja

wobiriwira  
wolusa

**Chitsanzo** Nkhalango yapsa ndi moto \_\_\_\_\_.

**Yankho** Nkhalango yapsa ndi moto wolusa.

- 1 Mbawala zikudya msipu \_\_\_\_\_.
- 2 Njovu \_\_\_\_\_ zathawa m'nkhalango.
- 3 Gwape\_\_\_\_\_ waphedwa.
- 4 Waya \_\_\_\_\_ ya magetsi waduka.
- 5 Anyani \_\_\_\_\_ ali m'mitengo.



## MUTU 19

### Dziko lachita mantha


Dziwani mawu awa

mphini

mzungu

opsa

mankhwala



Iwe edzi m'dulamoyo  
Malembo ako anayi  
Andiopsa powamva  
Dziko lonse lachitadi mantha.

Poti mankhwala wochiza iwe palibe  
Munthu wakuda wada nkhawa  
Naye mzungu wazunguzika mutu  
Dziko lonse lachitadi mantha.

Njira zokutengera n'zochuluka  
Kugonana, zingano, magazi, malezala  
M'menemu ndimo udzera  
Dziko lonse lachitadi mantha.

Mphini ine toto  
Magazi osayeza ndakana  
Lezala lobwerekana, Ine ayi  
Mswachi wobwerekana, ayinso  
Dziko lonse lachitadi mantha.

## **Mafunso**

Yankhani mafunso otsatirawa.

- 1 Kodi m'dulamoyo ndani m'ndakatuloyi?
- 2 Tchulani njira imodzi yomwe edzi imafalira.
- 3 Ndi chifukwa chiyani munthu wada nkhawa?
- 4 Fotokozani njira imodzi yopewera edzi.
- 5 Kodi ndi chifukwa chiyani nthendayi ikuchititsa mantha?

## Ntchito A Kuzindikira aneni

Tsekani mzere kensi kwa aneni m'ziganizo zotsatirazi.


**Chitsanzo** Amayi aphika phala.

**Yankho** Amayi aphika phala.

- 1 Edzi imapha anthu.
- 2 Mnyamata wamwa mankhwala.
- 3 Adotokotala amayeza magazi.
- 4 Mwana wakana mphini.
- 5 Tonse tipewe edzi.

## Ntchito B Kufotokoza za matenda a edzi

Fotokozani za matenda a edzi motsogoleredwa ndi mafunso omwe ali m'mabokosimu.





## MUTU 20

Kubwereza zam' mbuyo  
ndi kuyesa ophunzira

### Ntchito A Kuzindikira afotokozi

Tsekani mzere kunsi kwa afotokozi m'ziganizo zotsatirazi.

**Chitsanzo** Amisiri amanga sukulu yokongola.

**Yankho** Amisiri amanga sukulu yokongola.

- 1 Munthu wakuda wada nkhawa.
- 2 Ana ambiri amakonda masewera ampira
- 3 Iwo adaona nkhalango yobiriwira.
- 4 Nsimba yozizira sikoma.
- 5 Towera ndi mwana wathanzi.

### Ntchito B Kupereka matanthauzo a zilapi/ ndagi

Pezani matanthauzo a zilapi zotsatirazi kuchokera pagulu la mawu awa.

ntchentche  
m'mimba

nyalugwe  
mkango

ng'oma  
nungu

**Chitsanzo** Mkango walira wopanda matumbo.

**Yankho** ng'oma

- 1 Ndimayesa mphaka koma wakula.
- 2 Agogo anga malaya awo ndi minga.
- 3 Oletsani nyama tivinepo.
- 4 Ndine mfumu yam'nkhalango.
- 5 Ndine manda achakudya.

### **Ntchito C Kutsiriza ziganizo ndi aneni**

Tsirizani ziganizo zotsatirazi ndi aneni awa.

**amutema  
akuimba**

**atenthetsa  
akutsuka**

**wakana  
akusewera**

**Chitsanzo** Atsikana \_\_\_\_\_ mbale.

**Yankho** Atsikana akutsuka mbale.

- 1 Chimwemwe \_\_\_\_\_ nyimbo.
- 2 Mwana \_\_\_\_\_ mphini.
- 3 Maria ndi Tamanda \_\_\_\_\_ bawo.
- 4 Mwana wodwala uja \_\_\_\_\_ mankhwala.
- 5 A Nyasulu \_\_\_\_\_ ndiwo.



## MUTU 21

### Gogo Luwamba alangiza adzukulu

Dziwani mawu awa

gwada

njuta

langiza

nyonyomala



Gogo Luwamba ankakhala m'dera la Chiweto ndi adzukulu awo atatu. Wamwamuna adali Yasini ndipo aakazi adali Kaso ndi Matamando. Tsiku lina atadya mgonero, agogowa adaitana adzukulu awo ndi kucheza nawo motere:

<b>Gogo Luwamba</b>	Lero ndifuna kukulangizani kuti mukhale ana amakhaliwe abwino.
<b>Yasini</b>	Chabwino agogo, teroni. Tizitani kuti tikhale ana abwino?
<b>Gogo Luwamba</b>	Anyamata muyenera kunjuta kapena kunyonyomala mukamayankhula ndi akulu.
<b>Kaso</b>	Nanga atsikana, tizitani tikamayankhula ndi akulu?
<b>Gogo Luwamba</b>	Muzigwada. Kuonjezera apo, anyamata ndi atsikana muyenera kuthandizana ntchito zapakhomo.
<b>Matamando</b>	Agogo, mukunena ntchito zake ziti? Pajatu makolo ena amagwiritsa ana ntchito zoposa msinkhu wawo.
<b>Gogo Luwamba</b>	Ayi. Ndikunena ntchito zing'onozing'ono monga kusesa, kutunga madzi ndi kutsuka mbale.
<b>Yasini</b>	Zoonadi. Kusukulunso aphunzitsi amatilangiza kuti tizithandiza makolo.
<b>Kaso</b>	Zoona. Amatiuzanzo kuti tizivala bwino, tisamachite ndewu, kapena kunyoza anzathu.

## **Mafunso**

Yankhani mafunso otsatirawa.

- 1 Kodi Gogo Luwamba ankakhala ndi adzukulu angati?
- 2 Ndi nthawi yanji yomwe Gogo Luwamba adaitana adzukulu ake?
- 3 Tchulani malangizo awiri omwe Gogo Luwamba adapereka kwa adzukulu ake.
- 4 Ndi chifukwa chiyani Gogo Luwamba adaganiza zopereka malangizo kwa adzukulu ake?
- 5 Fotokozani zomwe makolo anu amakulangizani.

## **Ntchito A Kusanja ziganizo**

Lembani ziganizo zotsatirazi mu ndondomeko yoyenera.

- 1 Tsiku lina adaitana adzukulu ake.
- 2 Gogo Luwamba adali ndi adzukulu atatu.
- 3 Mayina awo adali Sikelo, Kaso ndi Matamando.
- 4 Adzukulu onse adamvera malangizowo.
- 5 Ankafuna kuwalangiza za makhalidwe oyenera.

## Ntchito B Kuzindikira aneni

Tsekani mzere kunsi kwa aneni m'ziganizo zotsatirazi.

**Chitsanzo** Gogo Luwamba adalangiza adzukulu.

**Yankho** Gogo Luwamba adalangiza adzukulu.

- 1 Matamando adathokoza agogo ake.
- 2 Ana abwino sachita ndewu.
- 3 Yasini akutsuka mbale.
- 4 Kaso adamvera malangizo.
- 5 Agogo akutunga madzi.



## MUTU 22

# Ziwiya zikhaulitsa banja la a Zinenani

Dziwani mawu awa

tanganidwa

nona

mudyo

gwirizana



Bambo ndi Mayi Zinenani amachokera m'mudzi mwa Waliranji. Iwo amagwira ntchito m'tauni ya Nkhwazi. Kawirikawiri amakhala otanganidwa koteru nthawi imasowa yoti atsuke ziwiya zaho. Tsiku lina iwo atapita kuntchito, Poto ndi Mbale adachezerana motere:

- Poto** Iwe mnzanga, ine ndiye ndazionatu. Anthuwa sakundisamala. Nthawi zonse ndikatha kugwira ntchito, sindithiridwa madzi. Zakudya zotsalira zimangoumira m'thupimu.
- Mbale** Bola iwe. Tangoona mmene ine ndikuonekeramu. Ndimanyamula zakudya zonona, koma osandisambitsa ndi sopo. Mafuta ndiye andimata. Kotero ndikulephera kupuma bwino. Komanso sindikukongola ngati kale.
- Poto** Asiye kuti aone polekera. Lero ndiwaonetsa chomwe chidameta nkhanga mpala.
- Mbale** Inenso andiona polekera. Mafuta ali noninoniwa, sindilola kuti achoke. Ntchentche zanditerazi ndizisiya kuti zimatirire. Adzadyeramo zili chonchi.

Bambo ndi Mayi Zinenani ataweruka kuntchito, Mayi Zinenani adatereka Poto kuti aphike nsima. Pothyakula nsimayo, idasakanikirana ndi nkhoko zopserera m'Potomo. Nayonso Mbale idangonyamula nsimayo mafuta ali noninoni ndipo ntchentche zakufa zidali zitakangamira ku mafutawo. Chakudyachi sichidawapatse mudyo. Iwo adalephera kudya ndipo adagona ndi njala. Zitatero, adagwirizana kuti azitsuka ziwiya zawo akangomaliza kudyeramo.

## **Mafunso**

Yankhani mafunso otsatirawa.

- 1 Tchulani komwe Bambo ndi Mayi Zinenani ankakhala.
- 2 Ndi chifukwa chiyani banja la a Zinenani silinkatsuka ziwiya zawo?
- 3 Kodi ziwiya zidakhaulitsa bwanji banjali?
- 4 Fotokozani ubwino wotsukiratu ziwiya tikangotha kugwiritsa ntchito.
- 5 Mukuganiza kuti chikadachitika ndi chiyani banjali likadadya chakudya chija?

## **Ntchito A Kusanja ziganizo**

Lembani ziganizo zotsatirazi mu ndondomeko yoyenera.

- 1 Patsikuli banjali lidagona ndi njala.
- 2 Banja la a Zinenani limakhala kwa Waliranji.
- 3 Banjali lidagwirizana kuti lizitsukiratu ziwiya.
- 4 Ziwiya zidagwirizana zokhaulitsa banjali.
- 5 Banjali lidali la utchisi.

## Ntchito B Kuzindikira mayina amwinimwini

Lembani mzere kunsi kwa mayina amwinimwini  
m'ziganizo zotsatirazi.

**Chitsanzo** Tamara akuphika nsima.

**Yankho** Tamara akuphika nsima.

- 1 Amayi amugulira Yosefe nsapato.
- 2 Iwo amakhala mu mzinda wa Nkhwazi.
- 3 Chididi ndi phiri lokongola.
- 4 Angoni amakonda nyama.
- 5 Atate ake a Malumbo akulima.



## MUTU 23 Kuoloka msewu

Dziwani mawu awa

msewu manzere mwachangu thamanga



Mphatso ankakhala m'dera la Kholingo. Iye ankaphunzira pasukulu yotchedwa Luso. Sukuluyi idali m'mbali mwa msewu waukulu. Mu msewumo munkayenda galimoto, njinga, ngolo ndi zina. Mphatso ndi anzake ankaoloka msewuwo popita ku sukulu. Makolo awo ankawalangiza kuti azisamala akamayenda pamsewu kuti apewe ngozi.

Tsiku lina, Mphatso ndi anzake adatenga mpira popita kusukulu. Iwo ankasewera mpirawo akuoloka msewu. Mwadzidzidzi, adamva anthu akufuula. Anthuwo ankawachenjeza chifukwa kumbuyo kwavo kunkabwera galimoto. Anawo atamva kufuulako, adathawira kumbali kwa msewu.

Anthu omwe adaona zimenezi, adakadziwitsa mphunzitsi wamkulu wa sukulu ya Luso. Iye atamva nkhaniyo, adasonkhanitsa ophunzira onse ndi kuwayankhula.

Mphunzitsiyo adati, “Musamasewere pamsewu. Poyenda pamsewu muziyenda kumanja. Pooloka msewu mujiima ndi kuyang’ana kumanja ndi kumanzere kenaka kumanjanso. Muzioloka mukaona kuti sikukubwera galimoto, ngolo kapena njinga. Pooloka msewu, musamathamange koma muziyenda mwachangu. Pakutero mudzapewa ngozi.”

Mphatso ndi anzake atamva izi, adazindikira kuti kusewera pamsewu ndi koopsa. Kotero iwo adasiya mchitidwewu. Ndipo adakhala zitsanzo zabwino polangiza anzawo za kuipa kosewera pamsewu.

## **Mafunso**

Yankhani mafunso otsatirawa.

- 1 Tchulani dzina la sukulu yomwe Mphatso ankaphunzira.

- 2 Kodi Mphatso ndi anzake atamva kufuula adachita chiyani?
- 3 Tchulani langizo limodzi lapamsewu limene mphunzitsi wamkulu adapereka.
- 4 N'chifukwa chiyani simuyenera kuthamanga pooloka msewu?
- 5 Fotokozani ubwino woti munthu woyenda pansi aziyenda kumanja.

### **Ntchito A Kupereka mawu otsutsana m'matanthauzo**

Sankhani mawu otsutsana m'matanthauzo kuchokera pa mawu awa.

<b>kumanzere waung'ono</b>	<b>oipa dana</b>	<b>kutsogolo nong'ona</b>
--------------------------------	----------------------	-------------------------------

**Chitsanzo** kuwa

**Yankho** nong'ona

- 1 abwino
- 2 kondana
- 3 kumanja
- 4 kumbuyo
- 5 waukulu

## **Ntchito B Kuzindikira aonjezi**

Muongezi ndi mawu wonena za mnene, mfotokozi kapena muongezi mnzake m'chiganizo.

Tsekani mzere kensi kwa aonjezi m'ziganizo zotsatirazi.

**Chitsanzo** Tinafika m'mawa.

**Yankho** Tinafika m'mawa.

- 1 Mphatso amaoloka msewu mwachangu.
- 2 Tinafika mofulumira kusukulu.
- 3 Mpira uja wagwera kutali.
- 4 Iye amayenda monyada pamsewu.
- 5 Ife tadya kale.



## MUTU 24 Imfa ya mfumu

Dziwani mawu awa

khwerere

zoopsa

nkhwenzule

zyoli



*Hmm! Hmm! Imvani kadzidzi  
Ali panthambi yamtengo  
Inde aloseradi tsoka  
Mwina mawa sikucha bwino  
Poti mfumu yathu ikudwala.*

*Khwerere, tamvani nkhwenzule  
Ili zyoli mu mtengo  
Inde iloseradi imfa  
Mwina mawa sikucha bwino  
Poti mfumu yathu chibayo chavuta.*

*Miyawoo, miyawoo, uyo ndi mphaka  
Nthawi zina amalira modabwitsa  
Inde aloseradi imfa  
Mwina mawa timva zoopsa  
Poti mfumu yathu ikudwala.*

*Wu, wu, galu naye akuwuwa  
Nthawi zina amawuwa mododometsa  
Inde aloseradi zovuta  
Ogo! Imvani chiliro  
Mfumu yathu yatisiya.*

## **Mafunso**

Yankhani mafunso otsatirawa.

- 1 Kodi m'ndakatuloyi ndani amene akudwala?
- 2 Nkhwenzule imalira bwanji?
- 3 Wodwalayo amadwala matenda anji?

- 4 Anthu adatsimikiza bwanji kuti wodwalayo amwalira?
- 5 Perekani zitsanzo za zikhulupiriro zomwe mukuzidziwa.

## **Ntchito A Kupereka mawu ofanana m'matanthauzo**

Pezani mawu m'ndakatuloyi omwe akufanana m'matanthauzo ndi mawu otsatirawa.

**Chitsanzo** yatisiya


**Yankho** yamwalira

- 1 zovuta
- 2 eya
- 3 kapena
- 4 chona
- 5 chilaso

## Ntchito B Kulemba ndondomeko ya nyama zomwe zidalosera imfa ya mfumu

Lembani ndondomeko ya nyama zinayi zomwe zidalira mu ndakatuloyi kulosera imfa ya mfumu m'mabokosi ali m'munsimu.

**Chitsanzo**





## MUTU 25 Kubwereza zam'mbuyo ndi kuyesa ophunzira

### Ntchito A Kulemba mawu moyenera

Lembani mawu osokonezawa moyenera.

**Chitsanzo** gwanida

**Yankho** gwadani

- 1 serawe
- 2 thangama
- 3 malankhwa
- 4 lazangi
- 5 mosadomado

### Ntchito B Kulemba kalata yamchezo

Lembani kalata kwa mnzanu wapamtima poyankha mafunso ali m'munsimu.

- 1 Kodi umaphunzira kuti?
- 2 Uli kalasi yanji?
- 3 Aphunzitsi ako ndani?
- 4 Mnzako wapamtima, dzina lake ndani?
- 5 Fotokozani momwe maphunziro anu akuyendera popereka chifukwa chimodzi.

## **Ntchito C Kutsiriza ziganizo ndi mayina amwinimwini**

Tsirizani ziganizo zotsatirazi ndi mayina amwinimwini ali m'munsiwa.

**Mulanje  
Mphatso**

**Lilongwe  
Shire**

**Nchalo  
Eliza**

**Chitsanzo** Agogo atuma \_\_\_\_\_ kumsika.

**Yankho** Agogo atuma Mphatso kumsika.

- 1 \_\_\_\_\_ ndi mtsinje waukulu.
- 2 Iwo anakakwera phiri la \_\_\_\_\_.
- 3 \_\_\_\_\_ ndi mzinda wokongola.
- 4 Nzimbe zimalimidwa ku \_\_\_\_\_.
- 5 \_\_\_\_\_ ndi mtsikana woimba.



## MUTU 26 Kupempha zipangizo zakusukulu

Dziwani mawu awa

tchuthi

phunzira

pempha

thyoka



Atupele amaphunzira pasukulu ya Nzama. Iye ali patchuthi, adakumbukira kuti nthawi yotsekulira sukulu ili pafupi. Atupele adapita kwa amayi ake kukapempha zipangizo zakusukulu.

- Atupele** Mwaswera bwanji, amayi?
- Amayi** Ndaswera bwino, kaya iwe?
- Atupele** Ndasweranso bwino. Amayi, ine ndili ndi pempho.
- Amayi** Pempho lotaninso, mwanawe?
- Atupele** Paja ife tikutsekulira sukulu Lolemba.  
Ndikupempha kuti ngati n'kotheka  
mundigulire zolembra, chikwama  
chotengeramo makope ndi lula.
- Amayi** Kodi lula lomwe ndidakugulira lili kuti?
- Atupele** Lidathyoka ndipo ndidakuuzani kale.
- Amayi** Tiona, koma pakadali pano ndilibe  
ndalamala zokwanira.
- Atupele** Ndiye nditani amayi?
- Amayi** Ndikapita kutauni ndikakugulira.
- Atupele** Chabwino amayi, ine ndidikira.

## **Mafunso**

Yankhani mafunso otsatirawa.

- 1 Tchulani sukulu yomwe Atupele ankaphunzira.
- 2 Kodi ndi zinthu ziti zimene Atupele ankapempha kwa amayi ake?
- 3 Ndi chifukwa chiyani Atupele ankapempha zinthuzo?

- 4 Kodi Atupele ankaonetsa bwanji ulemu popempha?
- 5 Mungatani makolo atakuuzani kuti alibe ndalama zogulira zipangizo zakusukulu?

### Ntchito A Kupanga ziganizo

Pangani ziganizo zomveka bwino ndi mawu awa.

**Chitsanzo** dikira

**Yankho** Tonse tikudikira aphunzitsi athu.

**thyoka  
gulitsa**

**pempha  
lemba**

**phunzira**

- 1 \_\_\_\_\_
- 2 \_\_\_\_\_
- 3 \_\_\_\_\_
- 4 \_\_\_\_\_
- 5 \_\_\_\_\_

## **Ntchito B Kugwiritsa ntchito mpatuliro m'ziganizo**

Mpatuliro (,) ndi chizindikiro chomwe chimasonryeza kupuma pang'ono komanso kupatula zinthu zomwe zili mumndandanda.

Lembani mpatuliro m'ziganizo zotsatirazi.

**Chitsanzo** Amayi andigulira kope pensulo ndi lula.

**Yankho** Amayi andigulira kope, pensulo ndi lula.


- 1 Kwathu timalima mbatata nyemba chimanga ndi chinangwa.
- 2 Kodi watenga nsapato zovala ndi chakudya?
- 3 Ine ndimakonda kuimba kuvina ndi kusewera mpira.
- 4 Dalo Tinyade ndi Ulemu akupita kusukulu.
- 5 Amayi akuphika nsima mondokwa ndi mbatata.



# MUTU 27 Kalulu alephera kukwatira Chiphetsa

Dziwani mawu awa

mphekesera kolapitsa mpikisano nkhongono



Kalekale m'nkhalango ya Ngwenya mudali Kalulu, Nthiwatiwa, Njati, Nkhandwe, Mbidzi ndi Nguluwe. Onsewa ankafunitsitsa atakwatira Chiphetsa mwana wa Mfumu Kambuku. Chiphetsa adali wokongola kolapitsa.

Tsiku lina, Mfumu Kambuku adaitanitsa msonkhano. Iye adauza onse kuti kukhala mpikisano wothamanga ndipo yemwe apambane akwatira mwana wakeyo. Onse adakondwera. Kalulu, Nthiwatiwa, Mbidzi ndi Nguluwe ndi omwe adalembetsa kudzachita nawo mpikisanowo. Pokonzekera, iwo adayamba kuchita masewera olimbitsa thupi.

M'mawa mwa tsiku la mpikisano, Kalulu adamanga zingwe m'malo osiyanasiyana. Zingwezo adazimanga modutsa msewu kuti opikisanawo akamathamanga, azikodwa ndi kugwa.

Wenzulo idalira, pyooo! Kalulu, Nthiwatiwa, Mbidzi ndi Nguluwe adaliyatsa liwiro lamtondo wadooka. Kalulu adathamanga mosamala koma anzakewo sadachedwe ndi kuyang'ana pansi. Maso adali kutsogolo pofuna kupambana. Mwadzidzidzi, mmodzimmodzi adayamba kukodwa ndi kugwa. Iwo adavulala kwambiri Kotero sadapitirzenso mpikisanowo. Kalulu adawadutsa onse monyada ndi kupambana mpikisanowo.

Kalulu akukonzekera za ukwati wake ndi Chiphetsa, kudamveka manong'onong'o woti kupambana kwake kudali kwa chinyengo. Nduna za mfumu zidafufuza mphekeserayo ndipo zidapeza kuti Kalulu adachitadi chinyengo kuti apambane. Kotero iye adalephera kukwatira Chiphetsa. Mfumu idalamula kuti yemwe adali wachiwiri kwa wopambanayo ndiye akwatire Chiphetsa.

## **Mafunso**

Yankhani mafunso otsatirawa.

- 1 Tchulani nyama ziwiri zomwe zinkapezeka mu nkhalango ya Ngwenya.
- 2 Ndi chifukwa chiyani kudali mpikisano wothamanga?
- 3 Kodi nyama zidakonzekera bwanji mpikisanowu?
- 4 Mukuganizakuti yemwe adakwatira Chiphetsa adali yani? Fotokozani yankho lanu.
- 5 Fotokozani kuipa kwa chinyengo pa mpikisano?

## **Ntchito A Kulemba chifupikitso**

Chifupikitso ndi kulemba kapena kufotokoza nkhani mwachidule.

Fupikitsani ndime yachitatu ya nkhaniyi polemba chiganizo chomveka bwino.

**Chitsanzo** Fupikitsani ndime yoyamba ya nkhaniyi.

**Yankho** M'nkhalango ya Ngwenya mudali nyama zosiyanasiyana.

## Ntchito B Kuzindikira afotokozi

Tsekani mzere kensi kwa afotokozi m'ziganizo zotsatirazi.

**Chitsanzo** Dimingu ndi waulemu.

**Yankho** Dimingu ndi waulemu.

- 1 Mtsikana wolimbikira wakhoza mayeso.
- 2 Guze wanyamula nkhuku yamawanga.
- 3 Mlimi waulesi sakolola zambiri.
- 4 Uli ndi zolembera zochuluka.
- 5 Talandira aphunzitsi anayi lero.



## MUTU 28 Banja lathanzi

Dziwani mawu awa

nthochi

mnkhwani

inswa

nsima



M'dera la Mzokoto mudali banja la a Dzonzi. Iwo adali ndi ana atatu; wamwamuna mmodzi ndi aakazi awiri. Banjali lidali lathanzi chifukwa linkadya zakudya zakasinthasinha. Iwo ankalima mbewu zosiyanasiyana monga chimanga, nthochi ndi ndiwo zakudimba. Banjali lidalinso ndi ziweto zambiri.

Tsiku lina, Mayi Nyasulu ndi mwana wawo Khumbo adapita kwa a Dzonzi kukacheza. Banja la a Dzonzi

lidakonzerza alendowo nkhomaliro. Iwo adaphika nsima yamgaiwa. Ndiwo zake zidali nyemba ndi mnkhwani.

Banja la a Dzonzi ndi alendowo adalowa m'nyumba kuti akadye chakudyacho. Mayi Dzonzi adadabwa kuona kuti Khumbo sanali kudya nawo.

“Ndi chifukwa chiyani mwanayu sakudya?” Mayi Nyasulu adayankha kuti, “Mwanayu sakonda nsima yamgaiwa ndi ndiwo zamasamba.” Bambo ndi Mayi Dzonzi adadabwa.

Bambo Dzonzi adafotokozenza alendowo motere, “Mukationa ife tikuoneka athanzi, timadya zakudya zakasintha sintha ngati zimenezi. Timadyanso zipatso monga nthochi, masawu ndi nthudza, ena amati nthema. Mu nyengo yadzinja, timadya inswa zomwe ena amati ngumbi.”

Mayi Nyasulu adathokoza chifukwa cha malangizowo. Iwo adalonjeza kuti akabwerera kumudzi, akalimbikitsa banja lawo kudya zakudya zakasintha sintha.

## Mafunso

Yankhani mafunso otsatirawa.

- 1 Kodi banja la a Dzonzi linkakhala kuti?
- 2 Tchulani mbewu ziwiri zomwe a Dzonzi ndi banja lawo ankalima.

3 Werengani umboni wochokera munkhani ndi zomwe mukudziwa kale m'mabokosi ali m'munsimu. Kenaka, lembani ganizo lomwe mwapanga.

		
<b>Umboni wochokera mu nkhani</b>	<b>Zomwe ndikudziwapo kale</b>	<b>Ganizo lomwe ndapanga</b>
Mwanayu sakonda nsima yamgaiwa ndi ndiwo zamasamba.	Munthu wankhuli sakonda kudya ndiwo zamasamba.	Khumbo ndi mwana wankhuli.
Mayi Dzonzi sadaphikire alendo ndiwo zankhuli.	Mlendo timamuphikira ndiwo zankhuli.	
Banja la a Dzonzi linali ndi ziweto zambiri.	Munthu wa ziweto zambiri ndi wolemera.	
Mayi Dzonzi adalangiza Mayi Nyasulu.	Munthu wolangiza anzake ndi wabwino.	

## **Ntchito A Kupereka mawu ofanana m'matanthauzo**

Pezani mawu kuchokera m'nhhani yomwe mwawerengayi omwe ali ofanana m'matanthauzo ndi mawu otsatirawa.

**Chitsanzo** zizwa

**Yankho** dabwa

- 1 nthudza
- 2 inswa
- 3 mbwanda
- 4 zifuyo
- 5 masamba amaungu

## **Ntchito B Kusanja ziganizo**

Sanjani ziganizo zotsatirazi m'ndondomeko yoyenera.

- 1 Pomaliza, adasamba m'manja.
- 2 Kenaka adadya chakudya.
- 3 Atamaliza, adadya chipatso.
- 4 Maria adaika chakudya patebulo.
- 5 Asadadye chakudyacho, adasamba m'manja.



## MUTU 29 Umodzi

Dziwani mawu awa

khala

mfolo

khwimbi

anthu



Taonani nyerere

*Tawaa, pamfolo ziyenda*

Umodzi, ndiye mphamvu zawo

Ukule bwanji mtolo, zinyamuzana

Ndithudi, izozi sizilephera

Nawo akakowa, pagulu auluka  
*Mbee* kuyera onse  
Ngati ufa aoneka  
Kukongola kwawo, ngati angelo  
Ubwino wa umodzi audziwadi

Njovu nazo umodzi, zimaudziwa  
Uthunthu wathupi lawo sizisamala  
Ziyenda *chinyachinya*, m'chigulu  
Khwimbi, zikhala polemekeza umodzi

Tidzaphunzira liti anthufe?  
Zitiposa bwanji zolengedwa zinazi?  
Tisanaimbe ya ndidayesanji nyimbo  
M'magulu tikhale pochita zinthu

## **Mafunso**

Yankhani mafunso otsatirawa.

- 1 Ndi chifukwa chiyani nyerere sizilephera ntchito zomwe zimagwira?
- 2 Fotokozani mmene akakowa amaonetsera umodzi wawo.
- 3 Kodi njovu zimayenda bwanji?
- 4 Fotokozani ubwino wogwirizana pogwira ntchito.

- 5 Ndi zinthu ziti zomwe mungakwaniritse kuchitira limodzi ndi anzau?

## Ntchito A Kuzindikira ałowam'malo

Tsekani mzere kunsi kwa ałowam'malo m'ziganizo zotsatirazi.


**Chitsanzo** Awo adabwera dzulo.

**Yankho** Awo adabwera dzulo.

- 1 Izo zimayenda m'magulu.
- 2 Zathu zalowa m'khola.
- 3 Kodi inu mumagwirizana ngati nyerere?
- 4 Ife timayendera limodzi.
- 5 Awa sachedwa kusukulu.

## Ntchito B Kufananitsa ndi kusyanitsa nyerere ndi akakowa

Lembani kusiyana ndi kufanana kwa nyerere ndi akakowa m'mipata yoyenera.





## MUTU 30

Kubwerezam' mbuyo  
ndi kuyesa ophunzira

### Ntchito A Kupeza mawu

Pezani mawu asanu kuchokera mu bokosi la malembo lili m'munsimu.

### Chitsanzo anu

p	i	k	i	s	a	n	a
e	n	a	n	u	b	k	p
m	n	k	h	w	a	n	i
p	h	o	k	o	s	o	m
h	b	w	e	r	a	y	a
a	n	a	r	s	t	h	n
g	y	n	s	i	m	a	i

### Ntchito B Kupereka matanthauzo a zilapi/ndagi

Sankani matanthauzo a zilapi zotsatirazi kuchokera ku mawu awa.

khwangwala  
chikope

mpaliro  
njoka

nsima  
nthochi

**Chitsanzo** Kaphiri ka kwathu kokwera ndi manja.

**Yankho** nsima

- 1 Diwa lam'nsenjere kugwaigwa. \_\_\_\_\_
- 2 Ndafera kubala. \_\_\_\_\_
- 3 Kandodo ka apongozi kusalala. \_\_\_\_\_
- 4 Kalibe miyendo, kalibe mapiko, popha nyama kachita kuuluka. \_\_\_\_\_
- 5 Msirikali wovala zoyerā m'khosi. \_\_\_\_\_

### **Ntchito C Kutsiriza ziganizo ndi afotokozi**

Tsirizani ziganizo zotsatirazi ndi afotokozi ali m'munsimu.

yofiira  
aukali

yaikazi  
waukhondo

iwiri  
aang'ono

**Chitsanzo** Ophunzira sakondwera ndi aphunzitsi \_\_\_\_\_.

**Yankho** Ophunzira sakondwera ndi aphunzitsi aukali.

- 1 Munthu \_\_\_\_\_ sadwaladwala.
- 2 A Zimba agula galimoto \_\_\_\_\_.
- 3 Ana \_\_\_\_\_ amakonda kusewera.
- 4 A Nyakamera ali ndi minda \_\_\_\_\_.
- 5 A Chisale agula mbuzi \_\_\_\_\_.



## MUTU 31

### Nthambi ndi agogo ake

Dziwani mawu awa

fwafwaza

mgaiwa

zipwete

mchenga



Nthambi anali mnyamata wa zaka khumi. Iye ankakhala ndi agogo ake kumudzi. Tsiku lina agogowa anatumwa Nthambi kuti akathyole chitambe kumunda.

- Agogo** Iwe Nthambi, upite kumunda ndi azakhali ako mukathyole chitambe.
- Nthambi** Chitambe chochuluka bwanji?
- Agogo** Chodzadza dengu lalikulu lija.
- Nthambi** Masamba onsewo agogo, tidzadya tsiku limodzi?
- Agogo** Ayi, ndikufuna ndidzafwafwaze ndi kuyanika. Tizidzadya mfutso nthawi yosowa masamba.
- Azakhali** Zoonadi agogo, mwandikumbutsa. Mfutso umakoma kwambiri ndi nsima yamgaiwa.
- Agogo** Ine mfutso umandikomera ndi nsima yoyerwa, pamene yamgaiwa imakoma ndi mcheni.
- Nthambi** Eee, koma nthawi zina micheni imapezekwa yoola. Kodi tingachite chiyani kuti isaonongeke?
- Agogo** Zoonadi. Micheni imafunika kuiphika pasanapite nthawi yaitali ikawedzedwa. Tikafuna kudzadya tsiku lina, timaitsuka, kuthira mchere ndi kuiwamba kuti isungike bwino.
- Nthambi** Chabwino agogo. Ndiye mfutsowu ukufunika kuuyanika pamalo abwino.

- Agogo** Eee, ukunenadi zonna. Poyanika pafunika kupewa fumbi ndi mchenga. Mchenga ukagwera mu mfutso ndiye kuti mfutsowo sudyeka.
- Nthambi** Chabwino agogo. Komatu ndipita ndi njala.
- Agogo** Ukadya zipwete kumundako. Likakhala phalali, udzadya ukabwera.

Nthambi ndi azakhali ake adathyola chitambe chodzadza dengu. Agogo aja adakondwera ndipo adamuyamikira kwambiri.

## Mafunso

Yankhani mafunso otsatirawa.

- 1 Kodi Nthambi adali ndi zaka zingati?
- 2 Ndi chifukwa chiyani Nthambi adakathyola chitambe chochuluka?
- 3 Mawu woti ‘kufwafwaza’ akutanthauza chiyani mu nkhaniyi?
- 4 Mukuganiza kuti ndi chifukwa chiyani Nthambi ankakhala ndi agogo ake?
- 5 Fotokozani zinthu zomwe mudachitapo limodzi ndi amalume kapena azakhali anu.

## Ntchito A Kuzindikira aonjezi

Tsekani mzere kunsi kwa aonjezi m'ziganizo zotsatirazi.


**Chitsanzo** Iye amayankhula mwansangala.

**Yankho** Iye amayankhula mwansangala.

- 1 Iye anakhuta kwambiri.
- 2 Nthambi amagwira ntchito mwachangu.
- 3 Azakhali anga akuyenda mwandawala.
- 4 Dzulo tinadya nsima yamgaiwa.
- 5 Aphunzitsi amagwira ntchito molimbikira.

## Ntchito B Kutsiriza ndondomeko ya kakonzedwe ka mfutso

Tsirizani ndondomeko ya momwe mungakonzere mfutso wa ndiwo zamasamba m'mabokosi otsatirawa.





## MUTU 32 Maluso aphindu


Dziwani mawu awa

mmisiri

katswiri

kopeka

mtchini



Mayamiko ankakhala m'mudzi mwa Kafewa.  
M'mudzimu munkachitika zitukuko zosiyansasiyana.  
Mayamiko adali ndi amalume ake womwe ankakhala  
kutali. Iye adaganiza zolembera kalata amalume  
akewo kuti awadziwitse za zitukukozo. Kalatayo inali  
motere:

Chizimba Primary School  
PO Box 12  
Malili  
12 June 2018

### Wokondedwa Amalume

Ndili wokondwa kulemba kalatayi. Ndikufuna kukudziwitsani zomwe zikuchitika kumudzi kuno.

Mudzi wathu wayamba kutukuka chifukwa cha maluso osiyanasiyana. Mnyamata wina wagula galimoto ndi pampu yopopa madzi. Pampuyi imapopa madzi othirira mbewu kuchokera mumtsinje wa Kalimira uja. Mbewu zikumera bwino ngakhale panthaka youma.

Chitukuko china ndi nyumba zamalata. Bambo Fuwa akumangitsa nyumba yaikulu. Iwo alemba ntchito mmisiri wamkazi. Mmisiriyu adaphunzira kumanga nyumba kusukulu zaumisiri.

Iye ndi katswiri ndipo anthu ambiri azizwa naye. Iye akumanga nyumbayi mothandizana ndi mnzake. Nyumbayi ikatha, aika magalasi olimba ndi okongola.

Ndakopeka ndi mmisiri wamkaziyo. Iye wapeza katundu wochuluka kupyolera mu ntchito yake. Mmisiriyu ali ndi galimoto yapamwamba. Alinso ndi malo ogona anthu apaulendo. Ndatsimikiza

kudzagwira ntchito zamanja zotukula mudzi wathu.  
Sindikufuna kudzakhala mtchona kudera lina.

Kodi simungabwere amalume kudzaona zimene zili  
kuno? Umisiri wasanduka mgodi. Mudzi wa Kafewa  
wasintha.

Pomaliza, landirani moni.

Ndine mphwanu.

Mayamiko


## **Mafunso**

Yankhani mafunso otsatirawa.

- 1 Kodi Mayamiko akulembera yani kalatayi?
- 2 Tchulani dzina la bambo yemwe akumangitsa nyumba yamalata m'nhaniyi.
- 3 Kodi mmisiri wamkazi adapeza katundu wanji kuchokera ku ntchito yake?
- 4 Fotokozani zitukuko zomwe mungafune zitachitika m'dera lanu.
- 5 Tchulani ntchito zina zamanja zomwe mukuzidziwa.

## Ntchito A Kulemba ziganizo zofotokoza za chithunzi

Lembani ziganizo zofotokoza za chithunzi chomwe chili m'munsichi poyankha mafunso otsatirawo.



- 1 Mukuona galimoto yamtundu wanji?
- 2 Nanga mukuganiza kuti ili ndi matayala angati?
- 3 Kodi akuyendetsa galimotoyi ndani?
- 4 Mukuganiza akupita kuti?
- 5 Kodi galimotoyi mwaikonda? Nenani chifukwa chake.

## **Ntchito B Kulemba kalata**

Lembani kalata kwa mnzanu yomufotoko zomwe zikuchitika kudera lanu poyankha mafunso awa.

- 1 Tchulani zinthu ziwiri zomwe zikuchitika kudera lanu.
- 2 Fotokozani phindu la zochitikazo kuderalo.
- 3 Kodi inu mumachita chiyani pa zochitikazo?



## MUTU 33 Kubwereza zam' mbuyo ndi kuyesa ophunzira

### Ntchito A Kutsiriza ziganizo

Tsirizani ziganizo zotsatirazi ndi mawu awa.

afwafwaza pampu	yamgaiwa zipwete	katswiri mcheni
--------------------	---------------------	--------------------

**Chitsanzo** Nsomba ya \_\_\_\_\_ ndi yokoma.

**Yankho** Nsomba ya mcheni ndi yokoma.

1 Nsimba \_\_\_\_\_ imapatsa thanzi.

2 Amayi \_\_\_\_\_ masamba amfutso.

3 Nthambi wathyola \_\_\_\_\_ kumunda.

4 Mayamiko ndi \_\_\_\_\_ wampira wamiyendo.

5 Chifuniro wanyamula \_\_\_\_\_ yopopera madzi.

### Ntchito B Kupereka mawu otsutsana m'matanthauzo

Perekani mawu otsutsana m'matanthauzo ndi  
mawu omwe ali ndi mzere kunsi kwawo m'ziganizo  
zotsatirazi.

- Chitsanzo**      Mtsikana wolimbikira uja wapita kusekondale.
- Yankho**          Mnyamata wolimbikira uja wapita kusekondale.
- 1 Iye anafika mwachangu kusukulu.  
Iye anafika \_\_\_\_\_ kusukulu.
- 2 Lusungu amathamanga popita kumsika.  
Lusungu \_\_\_\_\_ popita kumsika.
- 3 Ophunzira ali m'kati mwa kalasi yawo.  
Ophunzira ali \_\_\_\_\_ mwa kalasi yawo.
- 4 Atate atsika galimoto.  
Atate \_\_\_\_\_ galimoto.
- 5 Ana amwano ndi ochepta.  
Ana \_\_\_\_\_ ndi ochepta.

### Ntchito C Kutsiriza ziganizo ndi aonjezi

Tsirizani ziganizo zotsatirazi ndi aonjezi awa.

kamodzi	mosamala	mwachikulu
kumadzi	mwaukatswiri	bwino

- Chitsanzo** Zondiwe amayenda \_\_\_\_\_ pamsewu.
- Yankho**      Zondiwe amayenda mosamala pamsewu.

- 1 Yosefe akuoneka \_\_\_\_\_.
- 2 Khumbo amamanga nyumba \_\_\_\_\_.
- 3 Tamara wapita \_\_\_\_\_.
- 4 Wajomba \_\_\_\_\_ kusukulu.
- 5 Atupele amayankhula \_\_\_\_\_.

**Samalirani buku lanu moyenera.  
Pewani zinthu zimene zingaononge  
buku lanu kanthawi kochepa**




**Simungatenge kachilombo  
koyambitsa edzi  
pobwerekana mabuku**

## Tengani mbali popewa edzi



## Tetezani ana ku matenda a edzi



## Phunzirani zokhudza edzi

Kambiranani za edzi ndi ana, makolo ndi anzanu

Patsani mwayi anyamata ndi atsikana kuti  
azikambirana momasuka nkhani zokhudza  
kugonana ndi matenda a edzi